

H A R A N G V E
P R O N O N C E E

DEVANT LE ROY, SE-
ant en ses Estats generaux, te-
nuz à Bloys, le Dimanche.

xv. Ianuier, 1589.

P A R

*Messire Charles de Cosse Comte de Brissac,
seigneur d'Estelan, &c. grand Pannetier
& grand Fauconnier de France, Capi-
taine de cinquante hommes d'armes des
Ordonnances de sa Majesté, au nom de
l'Estat de la Noblesse de France, à laquelle
il presidoit.*



Iouste la Coppie imprimée à Bloys, par Iamet
Mettayer Imprimeur du Roy, P. l'Huillier.
M. D. LXXXIX.

PROVINCIAL

REVENUE

Case

F

39


.326

15896

THE NEWBERRY
LIBRARY

15896

Acquired by the University of Chicago Library
from the Newberry Library
in 1912



HARANGVE PRONONCEE

*deuant le Roy , seant en ses Estats gene-
raux à Bloys , par Messire Charles de
Cossé Comte de Brissac.*

SIRE,
Les Princes, dont le bon heur surpasse le meri-
te, arriuent quelquefois où leurs esperances n'osent
aspirer: mais comme en peu de temps ils s'esleuent
ainsi, peu de temps aueant le pouuoir de leurs Mo-
narchies: où au contraire ceux que la vertu conduit
au comble de leur gloire y demeurent, & rien ne
peut empescher, que Dieu (qui tiét leurs Couron-
nes) ne les enrichisse de prosperitez. De mesme,
SIRE, voyant vostre Majesté s'asseoir si longue-
ment sur ce trosne Royal, cela nous donne assez de
lumiere, que ce ne sont pas les mains de la fortune,
qui ont enuironné vostre front de ce double Dia-
dème, que c'est Dieu qui vuos establit nostre Roy,
& qui auparauant vous esleut Monarque des peu-
ples plus eslongnez: non pour la grâdeur de vostre
Royalle maison, non pour les marques vniuerselles
de la vailleure des François : mais pour la pieté, pour
la foy, la clemence & la magnanimité, dont il pleut
à son immense bonté, vous orner en voz plus ten-
dres années. Puis donc, **SIRE,** que c'est le merite
legitime & non l'auanture qui vous a constitué sur
tant de Prouinces, esleuant vostre Empire sur le sie

gè des Roys voz maieùrs, nous suppliõs celuy me-
 me qui vous a departy tant de graces, & qui nous à
 mis les armes aux mains pour sa gloire, la vostre,
 & celle de vostre Estat, S I R E qu'il plaise à sa tou-
 te puissance, inspirer tellemēt nos cœurs, que nous
 puissions enrichir voz trophées des despouilles &
 des conquestes de vos ennemis communs. Faisant
 calmer par vous les orages, dõt vostre France a esté
 visitée, & triompher vostre Majesté de la malueil-
 lance & de la temerité de ceux qui se sont reculez
 de l'Eglise saincte, & qui ont postposé aux sacrile-
 ges, aux brigandages, & aux vengeancees, la fidelité,
 l'honneur, & le respect que l'on doit à son Dieu, &
 à son Roy. L'on sçait assez que de vostre regne, le
 Ciel n'a permis la naissance de tant de malheurs:
 mais que durant le siecle des grands Roys ja passez
 l'heresie, le scisme, la discorde, & la diuision, se glisse-
 rent dans les cœurs de vos peuples. Quatre de vos
 deuanciers qui virent naistre ces Monstres, en sont
 fideles tesmoings: tesmoings en sõt encor les perils
 les combats, les rencontres, les batailles les villes en
 poudre, & les assaux où le bon heur, la vertu, & la
 force ont planté les victoires de vostre ieunesse, &
 luy ont acquis mille palmes, en conseruant le Scep-
 tre de nostre bon Roy vostre frere. Les preuues, &
 les gages de ses indicibles vertus, S I R E, nous font
 esperer beaucoup de douceur de l'amertume de
 nostre siecle, & croire que Dieu qui sçait temperer
 le bien & le mal, qui permit l'affliction en la Fran-
 ce, lors qu'elle estoit riche d'vnion, de pompes, &
 de conquestes, a faict naistre vostre Majesté, parmy

5
les traualx, & l'a quelque temps du depuis constituée prudente obseruatrice du mal, au remede duquel elle est destinée à fin qu'à celuy qui le cognoist mieux, & qui en a principalement supporté les ennuyx, & les peines, soient reseruez, les honneurs, & la gloire deuë à vn si iuste labeur. L'extreme necessité qu'en a ce Royaume, SIRE, vous y doit conuier, vous y doit appeller, vous y doit inspirer quant & les cœurs de tous voz subiects, aussi est-ce nostre commun desir, & par ainsi ne pouuons nous doubter que ceste disposition ne soit esmeuë en nous de plus haut. En vous SIRE, par les diuines lumieres qui esclairent les ames des Roys: en nous (auecques vostre Majesté) par les prisons, les gennes, les naufrages, les martyres, & la memoire de ceux, aux cēdres & aux reliques desquels, n'a sceu pardonner la rage des hereticques. Vostre France prostituée à leurs furies, toute desolée & presque despouillée de ses honneurs, au plus fort de son mal inuoque & reclame sans cesse le temps si longuement attendu: où nous supplions Dieu que par les mains d'un si Auguste Prince, elle puisse estre non secouruë, mais vengée, non sauuée, mais accreuë, non florissante, mais esleuëe sur toutes nations: & que lors de ce triomphe tant desiré, SIRE, Vostre Maiesté recueille l'honneur, vostre Estat le principal bien, & tous les peuples d'Europe participeront au bon-heur, estant l'affermissement de vostre Couronne le plus seur appuy de la Chrestienté. Or les victoires que nous souhaitons voir acquerir à vostre Majesté, ne nous seront point des nouueau-

tez inaudites, ce ne sera qu'une fuite & une continuation du passé, comme du chastiment que Dieu par vostre Majesté fait recevoir à ceste grande & espouvantable armée de Reistres, de Suisses, de Lansquenets, & François heretiques : qui par la bonne conduite, & vigilance de vostre Majesté, receut plus de honte & de perte, qu'elle n'esperoit s'acquérir de gloire & de bien. Plustost ne veit elle voz armes sur ce grand fleuve s'opposer à son passage, que la frayeur & l'estonnement, qui surprit les temeraires, la saisit & la dissipa. Dessors n'ayans autre asile que vostre clemence, tous leurs Suisses accoururent à vostre bonté, & y trouverent plus de grace & de misericorde, qu'ils n'auoient auparavant d'audace, & de desir de luy desplaire. Les autres aussi outreuidez que malheureux, furent la proye de voz armées, & seulement une poignée de gens sans deffence, au desastre desquels vostre grandeur daigna pardonner, s'en retourna comme trompette de la renommée, publiant les honneurs les loüanges, & les victoires de vostre Majesté. mais qui ne se promettoit des biens infinis de vous

SIRE, scachant combien de saintes benedictions à versé sur vous à sa fin la Royne vostre tres-honorée mere, que Dieu absolue, mere dis-je non de vous seul, mais de noz trois derniers Roys, non de noz trois Roys seulement, mais des trois Estats de ce Royaume. Or mere de noz trois Roys la puis-je doublement appeller, ayant parmy tant de troubles, & de perilleuses tempestes conserué leurs couronnes: & mere des trois Estats la dois-je aussi iuste-

ment nommer, puis qu'avec tant de peines, de sollicitudes, & de labeurs, elle a si vertueusement & sans varier deffendu l'Eglise Catholique, si genereusement elle a par les mains de vostre Noblesse, maintenu l'honneur des François, & opposé tant de fois sa prudence aux malheurs qui alloient sacrager le reste de la substance du peuple. La vertu & la saincteté de la Royne vostre femme, SIRE, conioinct beaucoup d'assurance en l'esperoir que nous auons de nostre prochain bon heur & tenons nostre siecle bien fortuné, d'auoir produict vne si rare lumiere de foy, de deuotion, de pieté, de respect, & d'obeyssance à vostre Majesté. Supplions Dieu qu'en elle il vueille accomplir les vœux de voz bons subiects, vous donnant lignee, aussi remplie de ses graces que ce Royaume en a de besoing. Vostre volonté, SIRE, nous donne plus d'argument de bien esperer que toute autre chose, en ce qu'il vous plaist à ceste heure entendre & receuoir les aduis de vostre Noblesse, sur les plus importans affaires de vostre Estat. Mais auant que vous les représenter sommairement toutefois (SIRE) i'accuserois volontiers mon insuffisance, si chacun ne sçauoit assez que nostre profession consiste plus au faire qu'au dire, & que l'honneur dont elle est plainne, peut couvrir de son merite le peu d'ornemēt de mon discours. Il me suffira seulement, que comme en la dispute des deux Musiciens, Pirhon & Cephisus, Pyrrhus fit iugement que Polibercon estoit meilleur capitaine, qu'aussi voyant discourir ces deux Torrents d'eloquence, Monsieur de Bourges

& Monsieur Bernard, vostre Majesté iuge que ie ne suis icy vn soldat. Cela donc me fait mettre à part la meffiance de bien parler, & diray à vostre Majesté, que nous nous presentons maintenant à ses pieds, pour luy requerir tres-humblement le reſta- blissement des premieres reigles & honneurs de l'Eglise, puis apres de vos dignitez, quant & le sou- lagement du peuple. Or estât nostre Religion la pierre fondamentale del'Estat, il nous a semblé iuste, voire necessaire d'en affermir les colonnes, & commencer par là au remede de noz malheurs. Et pource nous auons esté forcez à vous requerir, par assemblée, par serment, par loy fondamentale, ce S. Edict que vostre Royale bonté nous a octroyé, a- uec l'acte le plus celebre qui aye iamais esté fait parmy nous, Par ceste loy **SIRE**, vous auez tes- moingné que vous voulez estre aussi bon & cha- ritable à l'endroit de vos subiects Catholiques, que seueres obseruateur de la iustice diuine sur les heretiques. Oeuure. certes, qui constituë le vray office d'un grand Roy Tres-Chrestien. Par là **SIRE**, vous auez voulu couper le chemin à tous ces mau- uais conseils, qui souloient introduire l'humaine prudence parmy les statuts & le zele ardent de la foy, qui entre les vrayes Chrestiens ne se peut tem- perer, ny attiedir d'aucune mediocrité, mais sa per- fection gist en l'extreme, & estant vn feu enuoyé du Ciel, il ne scauroit qu'il ne brulle : aussi doit il consumer les diuisions, qui peuuent alterer les af- fections, & les effects, qui se doiuent consacrer au- seruire de l'honneur & de la gloire de Dieu, à la

reueren

reuerence de vostre auctorité, à la conseruation & au repos de la patrie. Vous auez voulu **SIRE**, introduire par là vne entiere oubliance du mal, vne amnestie perpetuelle de noz malheurs, & par là vous voulez **SIRE**, enuironner les bannieres de nostre foy & Religion du tesmoignage de vostre vertu: puisque preuenant les tres-humbles supplications de voz bons subiects, les requestes & aduis de voz Estats, il vous a plu obliger vostre Maiesté à la guerre contre les heretiques: guerre non feinte, non simulée, non subiecte a trefues, à accords, à paix, & à traictez: mais qui establit la vertu & la generosité des armes des Catholiques, l'obstacle & le chastiment de l'impieté des heretiques, là s'vniissent les desirs, là s'attachent les conseils, voire les âmes de voz plus fidelles seruiteurs & là reuient pour nous exciter la pieuse memoire de noz ancestres. Les grands Monarques voz predecesseurs ont sur ceste mesme base eleué les monts de leur gloire iusques dans le Ciel: aussi est-ce ceste diuine ardeur. **SIRE**, qui gaigne les batailles, qui dissipe les ennemis, qui plante la terreur, qui conioint l'obeissance, qui auance le merite, qui couronne le labeur: sans laquelle rien ne subsiste, rien ne fleurist, rien ne se peut affermir C'est elle seule qui est le lien, l'ornement, & la force de toutes choses. Quand donc il s'agist de la conseruation de ce qui est si saint, & si desirable, nous deuons depôser tout respect pour le suyue n'auouans pour compatriotes que ceux qui sont touchez de mesme desir. Les veilles, les larmes, & les travaux de ces anciens

François, semblent nous demander vengeance de ceux, qui après tant de religieux siècles ont violé les sepulchres de leurs peres, & des nostres. Et qui par le fer, la fureur, & la rage, ont voulu arracher d'entre nous ceste vniue Religion, que ces Peres saincts auoyent plantée par l'vniuers. Or si la guérison du mal nous est utile, l'exploict n'en est pas moins honorable à vostre Majesté. C'est ceste glorieuse peine, qui à tymbre de Lauriers les Couronnes de Clouis, Charles Martel, Charlemagne, S. Loys, & qui, comme elle a tousiours faict, remplira voz mains de palmes, foulât sous le pied de vostre auctorité, la temerité, le pariure, & les honteuses despouilles des heretiques : ceste pieté ne maintient, & n'esleue seulement ce qui est humain, & caducque: mais l'environne d'immortalité, & autre honneur que le sien ne doit produire que repentance. Que si la clemence est plus recommandable en vn Prince que la vengeance, & la rigueur. Certes le deuoir nous commande d'en separer les iniures que l'on faict à Dieu: car lors le glaiue doit estre ministre de la iustice des Roys. Si donc en la foy toute erreur merite punition, ceux là sont à bon droit condamnés qui ont poussé plus auant le témoignage de leurs demerites. Or entre ces ames reprouuees, il ne se peut remarquer secte si dangereuse, ne si abominable, que celle des huguenots, comme donc son impieté est extreme, extreme en puisse estre le chastiment. A cela, SIRE, vous appelle le repos de vostre conscience, la conseruation de vostre Estat, & le vieil exemple de nos Roys, qui n'ont

ia mais estimé trauail ne peine si honorable, que celle où se presentoit le seruice de Dieu, ayans tousiours esté aussi recommandables en pieté que redoutables en armes. Or il ne suffit à vostre Majesté de paroistre armée de vengeance contre les heretiques: nous esperons que par son moyen l'Eglise se repurgera de nonchalance, de confidences, de simonies & d'abus, se reduira dans les bornes de sa premiere candeur, & sous les saintes loix des Conciles sacrez, mesme de celuy de Trente. Et certes ie ne sçay si la fureur de ses ennemys est plus grande, que deplorables ses debordemens: qui s'abstiendroient de larmes voyant entre les mains de quelles personnes ses honneurs, & ses biens se sont dispensés: & que souuent les mains prophanes des femmes, & des soldats ont cueilly les fruiets dediez, & vouez à la paix des âmes, & à la gloire de Dieu. Veuille donc SIRE, le mesme S. Esprit qui a conduit vostre Majesté à vne si notable assemblée, vous inspirer tellement, que deormais la seule pieté, & la seule election dispence aux Pasteurs les âmes, les dignitez, & les charges Ecclesiastiques: à ce que les peuples benissent vostre Majesté, qui ayant receu à la feste du S. Esprit les Couronnes de polongne & de France, fonda premierement en son honneur son saint ordre: mais en fin couronna sa deuotion du retablissement en l'Eglise de la voie du S. Esprit. Et ce pendant qu'il vous plaira vous occuper à ces saintes deliberations SIRE, vostre Noblesse vous tesmoingnera tousiours son obeissance, & les effects de son tres humble seruice. ceste

noblesse de qui la vertu, la fidelité, & le courage a tant de fois acquis des victoires à vostre Majesté, & mesme celle que vous voyez maintenant deputée de ses compagnons, qui s'efforce de conseruer par ses aduis, bons mesnages, & reshumblables supplications, les temples, les autels, les monumens, les villes, les palais, les droicts, les loix, les coustumes, les possessions, les auantages, les dignitez, & les bornes de ce Royaume. Mais ceste troupe n'est seulement commise en ceste assemblee de la part de ses compagnons **SIRE**, nous regardons encor ceux dont nous sommes descendus, & les ames, & les courages, & les entreprises, & les effects, & le riche honneur de tous les cheualiers qui ont mis la main aux fondemens, auancemens, & conseruation de cest Empire, & qui en diuerfes fortunes nous ont tracé aux despens de leurs vies les vrayes marques de la noblesse, & le seur chemin de vertu. Aussi n'est ce pas les Caiers seulement de nos contemporains que nous apportons à vostre Majesté, c'est l'exemple de noz maieurs, & ce que la generosité hereditaire nous doit auoir apporté d'inclination au bien de nostre patrie. Ceste reigle d'antiquité rend nostre profession par plusieurs moiens la plus digne, & la plus recommandable quel'on scauroit imaginer: ayant cecy de grand qu'elle faict employer iusques à la vie de ceux qui en sont, pour la deffence, & pour la conseruation de ceux qui par profession, ou par foiblesse, ne se peuuent deffendre d'eux mesmes: & par là **SIRE**, les Prophetes de Dieu, & leur ministere saint, la Iustice, les Marchans, les arti-

zans, les manouuriers, les vieux, les impotens, les veufues, les orfelins, les dames & leur honneur font de la protection de l'espee du Gentilhomme. Tout cela n'est rien au respect des limites de la patrie qui reposent sous sa valeur, & le plus precieux gage des choses humaines, l'image & l'Oinct du Seigneur, la personne sacrée de vostre Majesté, sa famille, ses droicts, son auctorité, sont encor de l'honorable deuoir de nostre garde. Mais ces choses là n'opparent poinct tant d'estime en vne ame vertueuse, que fait vn don plus haut, vn bien celeste, vn priuilege plus important, vn comble de tous deuoirs, vne maistresse obligation qu'à la noble Chrestienne à la deffence de la foy, par le seruice donc que nous faisons à celuy premierement à qui seruent toutes choses, puis apres à vostre Majesté, par la fidelle amitié à nos esgaux, & la protection aux autres nous accomplissons le deuoir de Gentilhomme, que noz maieurs ont cōpris, sous ce seul mot d'honneur, c'est cet honneur, S I R E qui nous oblige à rendre compte exact de tout ce que nous demanderons, conseillerons, & consentirons en ces Estats: & ne pouuons nous departir de tout ce qu'il nous a prescript sans estre desauouez de nos freres, sans faire iniure à noz enfans, sans degenerer de noz peres. C'est cet honneur qui esclaire noz actions, & les va sans cesse parangonnant à la pieté, loyauté, & constance memorable de ceux dont nous nous vantons d'estre sortis. C'est cet honneur qui nous represente ceux qui ont chassé & vaincu les Goths, les Vvandalès, les Arriens, les

Albigéois, les Lombars, les Sarrazins & Payens: bref qui ont poursuiuy la deffence de la foy, & les victoires de noz Roys, des derniers riuages de la mer Occéane, bien loing pardelà celle du Leuant, & qui n'ont laissé autres bornes à la reputation de leur valeur, que celle que le Soleil prent à faire le tour de la terre. toute la troupe de ces preux cheualiers semble discourir nuict & iour à nos yeux, nous demandans compte du zele, de la ferueur que nous deuons auoir à la deffence de nostre Religion si nous y courons comme ils ont fait à perte de vie, à l'abandon de femmes, & d'enfans, & aux risques, d'vser à la chaisne le reste de noz iours, immolez au loyal acquit de la plus sainte, plus deuë, & plus iuste promesse que nous pourrions iamais contracter. tous leurs labeurs, toutes leurs fatigues tous ces memorables sieges vaillamment opiniastrerez, tant d'incommoditez, de maladies, de faim, de pauuretez, de naufrages, & d'estranges aduanturés adiournent noz consciences, & noz honneurs, a de semblables traualx: nous regardent pour veoir si la delicatesse, si la vanité, si la gloire desguisee, si le faux honneur, si le gain infame, nous destournera du sentier qu'ils nous ont battu. D'ailleurs ces armes enrouillees qui pendent aux parois de nos temples, le blason de ses vieux escus, rappez de tant de batailles, est vn depost que nous auons d'eux, pour le rendre à noz enfans qui comme nous, y pretendent leur part. N'ayans donc rien au cœur, que de rendre à iamais le mesme tesmoignage de nostre profession que noz deuanciers, nous sup-

plions vostre Majesté, vouloir favoriser l'antiquité de nos droicts, & de nos franchises: & reconnoistre en nous les peines, & les fideses seruices de vos maieurs, quant & les nostres. Mais a fin de les continuer mieux, S I R E. Il vous plaira interposervostre auctorité, à ce qu'en vous seruant le bon ordre puisse correspondre à nostre intention, & pour cet effect S I R E, remettons nous deuant vos yeux les reglemens, & les ordonnances militaires des Roys vos predecesseurs, & de vous S I R E, & vous requerrons aussi tres- instamment, que ny par achapts, ny par faueurs, aucun ne se puisse attribuer le tiltre de Gentilhomme. La conseruation de l'ordre de messieurs les Cheualiers de S. Iean de Ierusalem, touche de si pres à la nostre, que sans nous preiudicier grandement, nous ne la sçaurions passer sous silence: & ne vous supplier poinct du maintien de leurs priuileges Mais l'establissement de tout Empire, ne se maintenant par la seule force, ny par la seule & loyale valeur des Cheualiers: ains la iustice estant l'un des plus fermes appuis de toute domination, nous supplions tres-humblement vostre Majesté, mettre la main à cet œuvre, en retrancher les superfluites, & faire desormais que les charges qui doiuent dispenser l'equite à vos peuples, se puissent acquerir par preud'homme, par merite & non par argent. L'adiousteray S I R E, que les mauuais mesnages, les desreglemens, & larcins manifestes des deniers sacrez au soustenement du Royaume, nous contraignent à exciter encor vostre iustice, contre ceux, qui aux manimens de vos finances, se

sont par trop dispencez au preiudice du public. La
 pauureté de vostre peuple SIRE, se conioinct à
 ces tres humbles supplications, sa misere, sa disette,
 & l'oppression de son labour implore dans ses lar-
 mes, & dans ses cris le soulagement de ses angoisses
 & vostre Majesté, à qui Dieu a commis tant de mi-
 lions d'ames, accomplira l'œuvre, moderant les
 subsides, réglant ses finances, reestabliſſant la bonne
 iustice, poliçant les gens de guerre, faisant refor-
 mer l'Eglise, & chastiât les ennemys de nostre sainte
 Religion. Par ainsi vous serez le Soleil, SIRE, qui
 alentira les orages, & dissipera les brouillars de
 nostre siecle, nous participerons au salut, mais à
 vous seul en demeura la gloire. Et lors puisse l'egli-
 se florir plus sainctement que iamais, puissent les
 armes de la Noblesse couper les nœuds Gordiens
 reservez au bon heur de nostre Alexandre & puis-
 sent les peuples, sous la grandeur & les loix de
 vostre majesté, iouyr de tout autre repos, mais brus-
 ler du soing d'esgaler à ses bien faiçts les chants, &
 les louanges de ces triumphes. Ainsi durant voz
 ans SIRE, perissent les heretiques, ainsi prenne le
 Ciel vengeance de leurs erreurs, ainsi leurs despouil-
 les seruent de monumens aux Roys, qu'ils en ont
 arrachez, ainsi la France trouue pour iamais en leur
 perte son salut, sa lumiere & sa force. Ainsi les tem-
 ples soient resplendissans de la gloire diuine, ainsi
 en soient les Pasteurs reuerrez, ainsi puisse leur de-
 uotion, leur doctrine, & leur soing retirer les ames
 esgarees de la foy, ainsi la Religion sainte soit esle-
 uée de nos iours au comble de ses honneurs. Soit
 ainsi

ainsi la Noblesse la terreur des ennemis, le lustre, & le soustien de l'Estat, les arcs bontés de l'auctouré Royale, ainsi ses armes puissent multiplier les palmes, & auancer les bornes de ce Royaume, ainsi sa generosité puisse deuancer la valeur de ses peres, ainsi la parfaicte obeyssance, & la seule vertu soient les guides de sa vaillance, ainsi puisse elle esgaler son courage à son deuoir, & l'Empire de son Prince à la terre. Ainsi puisse le peuple estre sauué de ses maux, & iouyr d'un Ciel fauorable, ainsi se confondent ses calamitez, ainsi Dieu vueille benir ses peres & finir ses trauaux, ainsi son bien corresponde à sa droicteure, & son obeyssance, à la grandeur, & à la bonté de son Roy.

• 103

C



